

## Nsân saba cir kaplãn

<sup>1</sup> -Ye yãn, kai- nkây tẽ ga yar ye na, ke wii wĩ pãã tuu cãã pye wa kai- bye fegbecãã yaha. Woo kẽ Yãhã Dya Yesu Crise ne, tesẽ u kaplãn nkây ke cĩinde yrã wãã nawee kẽ. Tuu pye kãntraha na, wo ba naa u yẽ kaplãn luhu, wo naa u yãã yĩnde ne, wo sẽ u yãn naa n yai ye, ma sya naa koho tẽ u na. <sup>2</sup> Woo kẽ u cĩinde yrã wããfua. Wo u yãã yĩnde ne, koo kẽ wo u wĩ pãã ye ye. Woo kẽ u pye Yãhã tãy, ma pa cĩinde yrã ne, lii wãkuayãã wee le na ye. <sup>3</sup> Woo wii too yãã yĩnde ne, ma u yẽ kaplãn luhu, wo u wĩ yar ye na. Wo n traha ye seefar le wo ne. Ye sẽ yãã, wii seefar le Yãhã ne, tesẽ ke Dya Yesu Crise ne, ke syi ne ye ga nii wo wãn syi dyan. <sup>4</sup> Wo kai- ngĩ yrũhũ n yar ye na, le ma wo ye nuhungbã.

### *Yesu kãnde wãyãr cãã- wo*

<sup>5</sup> Yesu tuu wo klaha lii ne, le nde, waa le yar ye na. Yãhã ma cãã-, wam wee yãã ke na ye. <sup>6</sup> Wo ma yee wo seefar le Yãhã ne, ma -sẽ maha n yãr wam wo, wo sẽ laha ye. Wo ma kawarfuafa, wo sẽ cĩinde ke ye. <sup>7</sup> Yãhã ke -sẽ ma cãã- wo, wo ma -sẽ n yãr ke cãã- wo, wo wãã le wii ne. Yãhã Dya Yesu ntãn mpãy pe woo, pe wo kapee- bye yee laha n kãã wo yĩn na gbegbe.

<sup>8</sup> Wo ma yee wo sẽ kapee laa ge pye yãã ye, wo plaha wii ya, cĩinde wee wo wĩ laa na ye.

<sup>9</sup> Kapee- nkây too pye, wo ma -sẽ ke pãã yi Yãhã

ye, ke ga tyii wo kapee- foho na ke kuāŋ ne. Āwā, Yāhā yee, ke ga wo kapee- bye yee laha kãã wo yīŋ na. Yāhā sroŋ, ke sē dur n yi ke kapān kur ye ye. <sup>10</sup> Wo ma -sē yee wo sē kapee- pye ye, wo Yāhā ta kawarfuafua, ke kapān sē nii gbāã wo laam wo ye.

## 2

<sup>1</sup> Waa u pii ne, n kai- ngĩ yrūhū n yar ye na, ye ma syi ye ba naa kapee- pye ye. Wii ma -sē kapee pye, koholefua ma, u sē kapee pye yāã ye, u ga ba dye ye kuε ye u Yāhā syii ye kē. Woo kē Yesu Crise ne, woo wii u sroŋ. <sup>2</sup> U ba ku mpar draha wo wo kapee- wāpye wĩ na. Loo n ta, Yāhā n ga wo wānar sya wo ye wo kapee- wāpye wĩ na. N sē yee wii ya kapee- ye, nawee- kur bye kapee-.

### *Wii u seefar le Yāhā ne*

<sup>3</sup> Kānde lii Yāhā le ta, wo ma le katan yār, wo ga cã wo ma Yāhā ne. <sup>4</sup> Wii ma yee woo ma Yāhā ne, u sē -sē le kānde katan yār ye, woofua ma kawarfuafua. U Yāhā cĩnde fla sye. <sup>5</sup> Wii u -sē Yāhā laam wĩ pye, Yāhā wĩ sroŋ n tã y woofua ye cĩnde. Wo laam wo, nawee tuu ga waha pye mii u cã u seefar le Yāhā ne, loo ne nde: <sup>6</sup> Wii ma yee woo seefar le Yāhā ne, u yai u naa u troho tãhā Yesu yor wo.

### *Yāhā kānde katanfuẽ*

<sup>7</sup> Naambiyābuam, lii tē ga yrūhū yar ye na, Yāhā kānde katanfuẽ laa sē ne ye; katan lii le bii cãã yar ye na, loo ne. Loo katandyaha nde kapān laa ne; ye le luhu yāã: <sup>8</sup> Le ma katandyaha, ma maha ma katanfuẽ. Lii le ta le n nii katanfuẽ le

nde: Yesu Crise u troho tãhã le wo, ye bye ne. Ye sē yãã, wam ter n kãã, le Yesu Crise cĩnde cãã- n nii n yehe wo kē.

<sup>9</sup> Wii ma yee woo u troho tãhã ke cãã- na, ma -sē tyii u nampyeŋ wĩ n fũhũ u ye, ufua ma wam wo nantãŋ. <sup>10</sup> Wii nampyeŋ ntãŋ ma dye u tãy, ufua ma cãã- wo. Waa ter saha kapee wãpyeŋ yãŋ gbe woofua pyer na ye. <sup>11</sup> Wii ma -sē tyii u nampyeŋ wĩ n fũhũ u ye, ufua ma wam wo, u u troho tãhã wam wo, u sē u ya kakue cã ye, pe wam u ta u n nii fũũ wãŋ syi dyaŋ.

*Driyē wũhũ, Yãhã wũhũ ne*

<sup>12</sup> Waa u pii ne,

n saba nwo yrũhũ ye kē, ye le cã ye yee,  
ye kapee- yee laha kãã wa  
ye yĩŋ na gbegbe Yesu kãmay na.

<sup>13</sup> Yii mpãy tee ma wãle,

n saba nwo yrũhũ ye kē, ye cã ye yee,  
wii tuu pye ke kai- bye fegbeyale wo,  
ye u wĩ cã yigi.

Yii mpãy tee ma naanfãm,

n saba nwo yrũhũ ye kē, ye cã ye yee,  
Setane wii u ma sãndãpee yĩŋfua, ye u yia.

<sup>14</sup> Waa u pii ne,

n saba nwo yrũhũ ye kē, ye cã ye yee,  
ye wo Tuhufua Yãhã wĩ cã yigi.

Yii mpãy tee ma wãle,

n saba nwo yrũhũ ye kē, ye cã ye yee,  
wii tuu pye ke kai- bye fegbeyale wo,  
ye u wĩ cã yigi.

Yii mpãy tee ma naanfãm,

n saba nwo yrũhũ ye kē, ye cã ye yee,

laam ma ye ye Yāhā wūhū kue ye.  
 Ye Yāhā kapān sya le yaha ye laam wo,  
 ye maha sāndāpee yīnfua yia.

<sup>15</sup> Ye ma syi ye taha kuee driyē wūhū na ye faha Yāhā yaha ye. Ye ma syi ye yīnde n yi too driyē ngaa na ye. Driyē wīi ma n tāy wii ye, wo Tuhufua Yāhā wīi saha tāy ufua ye ye. <sup>16</sup> Driyē wān nde bye nde: Kapee- nkāy bye nawee tuu ga n yigi u laam wo, tesē yīnde wīi ne, ma suhu yatan ne wale wān kue ye, too nde sē n yir Yāhā fla na ye, te n yir driyē nge goo laam wo. <sup>17</sup> Ke driyē -sē nge, ke n pai kua kāā ke wān ne te yīnde yigi nawee- kē. Mboo nawee, ma'a -sē Yāhā laam wīi pye, maa cīinde yrā yāā Yāhā Yai wo, wākuayāā wee loo na ye.

### *Wii u ma kawar Crise*

<sup>18</sup> Waa u pii ne, ke driyē kuayale nɔ wa. Ye le luhu yāā, u kawar Crise yai u yi ke driyē kuayale wo. Yagaa, nawee- mpāy ma wa, pe nihi. Wo ga waha poo mii bya yee kawar Crise. Mboo wii ma koo fla yāŋ, maa cā ke driyē kuayale nɔ gbe taha.

<sup>19</sup> Poo nawee- mii, pe yi wo nklāŋ wo, pe laam sē -sē pye wo wāŋ ne wācɛŋ ye. Pe laam ma ne pye wo wāŋ ne wācɛŋ, pe ne ga kuee wo ne. Pe pe ya cɛr yi wo nklāŋ wo, wo sē le cā laha la yagaa ma yee, pe sē pye wo ne cīinde ye?

<sup>20</sup> Yii poo na, Yāhā gii ke laha ke kānkai- bye wo, ke Yāhā Yrā le ye laam wo, koo kē ye n Yāhā cīinde cā. <sup>21</sup> Ya'a yāā, tē saba nwo yrūhū ye kē, le sē nii mii, ye sē le Yāhā cīinde cā ye. Ye Yāhā cīinde cā, ye maha cā ma yee, kawar sē n yi cīinde wo ye, loo ne ta n u saba yrūhū ye kē.

<sup>22</sup> Nawee wii syi -sē kē u ma kawarfuafua? Woo kē wii ne u n yee, a Yesu sē kē u Yāhā Yīndefua Crise ne ye. Woo kē u ma u kawar Crise, u wo Tuhufua Yāhā wīi sye, ma maha ke Dya sye taha le na. <sup>23</sup> Ye cā ma yee, wii ma Yāhā Dya sye, u Yāhā bya sye. Wii ma le sya u laam wo, ma maha le pāā nawee- yīnde na ma yee, Yāhā Dya kē Yesu ne, ufua ma Yāhā bya ne.

<sup>24</sup> Loo ne, yii, Yāhā kaplāŋ nkāy tee cāā luhu, -ye ke le yaha ye laam wo! Koo ngīi ma kuee yai ye laam wo, yaa nii loho saa naa n yi ye nsoho wo, Yāhā Dya ne tesē Yāhā ne ye. <sup>25</sup> Yāhā Dya tuu -sē yee woo ga ba ngii wāā wo kē, koo kē cīinde yrā ne, lii wākuayāā wee le na ye. <sup>26</sup> Mpāy pe n ke pe ye wlāhā le pe kāmpee wo, n kaplāŋ ngīi yrūhū ye kē poo wīi na. <sup>27</sup> Yii poo na, Yesu Yāhā Yrā le ye laam wo, le n kuee yai ye laam wo. Yāhā Yrā le -sē ma ye laam wo, ye maha yai la, ye naa waa ter kaklaha luhu? Aye reħe! Ye cā Yāhā Yrā ne, le ye klaha kai- bye ne. Cīinde wūhū ya le ye klaha, kawar wūhū sē kē ye. Loo na, ye nii loho ma n naa n yi ye nsoho wo Yesu ne ye, mii Yāhā Yrā le ye klaha le ne mii.

### *Yoo syi u ma Yāhā puee?*

<sup>28</sup> Āwā, waa u pii ne, ye nii loho ma n naa n yi ye nsoho wo Yesu ne ye! Wo ma nii loo pye, Yesu ma ba fe gbe yi per gii, wo laam ga ba tege nii tee nen wo, fyar saa ba wo yigi u yīnde na ye. <sup>29</sup> Tee cā u Yesu Crise sron, u sē kapee pye yāā ye, ye yai ye maha cā ye yee, nawee wii kānde ma sron, Yāhā puee kē woo ne.

### 3

<sup>1</sup> Ye cã wo wĩ le n tãy wo Tuhufua Yãhã ye mii, wo ntãñ sronj dye ter ke tãy, ke n sya wo yee ke pii. Cĩnde ne, Yãhã pii me wo ne. Nawee- bye sē le cã ye. Ya'a yãã, mpãy sē wo yãñ Yãhã pii ye, -ye cã ye yee, pe sē cãã wo Tuhufua Yãhã cã ye, koo kē. <sup>2</sup> Naambiyãm, nanga nge na, Yãhã pii me wo ne. Too -sē ga ba nii ngii sukũhũ gaa laam wo, waa sē loo cã wa ye. Too lii ya cã, loo ne nde: U Yesu Crise ma ba dur ba, waa nii u wãñ syi dyañ, wo ba u sronj yãã yĩnde ne. <sup>3</sup> Wii u koho taha yaha u Yesu wãpañ na ke syi, u u laam gbihi n ta yalebye, pe n yõ mii Yesu laam dyañ.

<sup>4</sup> Mboo wii ma dye kuee kapee- wãpyeñ wo, ma wee yĩmbui nen na Yãhã ne ye, kãnde lii Yãhã le ta, ma loo sye. Ma sē yãã, kãnde lii Yãhã le ta, le wãsyen ma kapee. <sup>5</sup> Ye cã Yesu woo wii u sē kapee pye yãã ye, u pa maa wo kapee- yee laha kãã wo na. <sup>6</sup> Loo na, wii ma nii loho sē n yi pe nsoho wo Yesu ne ye, ufua saa naa kapee- pye nantãñ ye. Wii ma -sē nii kapee- pye, ufua sē Yesu cã cĩnde ye, u sē maha u wĩ war ye. <sup>7</sup> Waa u pii ne, ye ma syi waa n ba ye wlañ u ye le u kãmpee wo ye! Wii ma kasronj pye, woo gε sronj mii Yesu wãñ syi dyañ. <sup>8</sup> Wii ma nii kapee- pye, sãndãpee yĩñfua Setane puee kē ufua ne. Ye sē yãã, u sãndãpee yĩñfua yir ma nii kapee- fla ya pye. Yãhã Dya -sē pa u n pai u sãndãpee yĩñfua tēmpee pye klaha- tãñ.

<sup>9</sup> Wii Yãhã u ta u n dur see laanfãyõm ne, u saa naa kapee- pye ye. Ma sē yãã, ma'a dur see laanfãyõm ne, fãnga gii Yãhã Yrã ke wãã ma kē,

ke ga kuee yai tãŋ ma laam wo. Yāhã ke ma ma Tuhufua, ma saa naa kapee- pye ye. <sup>10</sup> Lii le Yāhã pii war n yi sãndãpee yĩŋfua pii ne, loo ne nde: Wii ma yee u sē kasroŋ pye ye, tesē u nampyeŋ wĩ sē maha n tã y u ye ye, Yāhã puee sē kē usyifua ne ye.

*Ye tyii ye ntãŋ n naa n dye yii tã y!*

<sup>11</sup> Yāhã kapãn lii tee cãã luhu loo ne nde: Ye tyii ye ntãŋ n naa n dye yii tã y! <sup>12</sup> Ye sē yãã, faalefa Kayē bii u ya ta sãndãpee yĩŋfua puee, ma u cĩfua gbã boo. Wo ma syi wo nii Kayē wãŋ syi dyaŋ ye. Nwa ta u n bii u cĩfua gbã boo? Kayē pyer bii pee. U cĩfua woo pyer -sē bii yõ. <sup>13</sup> Wo nna, ya'a yãã driyē ngefa pe ye laha, ye ma syi le n ye fe gbe ye! <sup>14</sup> Wo cã ma yee, yagaa wo sē maha wee mii wo ku ye, wo ma cĩnde yrãŋ na Yāhã yĩnde na. Ya'a yãã too le pãã ke syi, wo nampyeŋ- ntãŋ me pe dye wo tã y, loo ne. Wii ma yee u nampyeŋ ntãŋ sē dye u tã y ye, u maha ma mii u ku Yāhã yĩnde na. <sup>15</sup> Wii ma u nampyeŋ- laha, naboofua kē u ne. Ye le cã, cĩnde yrã lii wãkuayãã wee le na ye, le wee usyifua ye ye. <sup>16</sup> Ye sē yãã, Yesu tuu wo gbã sya ma ku, koo syi kē pe n yee, nawee ntãŋ sroŋ dye u nampyeŋ tã y cĩnde. Loo ne, Yesu tuu yar wo na ke syi, wo bya yai wo yãŋ Yesu na. Wo sē wee yrãŋ na wii ya wĩ na ye, wo ma yrãŋ na wo nampyeŋ- wĩ na. <sup>17</sup> Mboo walefua, taa ma nampyeŋ yãã fen laam wo, ma'a yĩmpe tyĩn tã u fen na, maa waha yee la, Yāhã ntãŋ dye ma tã y? <sup>18</sup> Waa u pii ne, ye sē yãã, ma'a yee ma nampyeŋ ntãŋ dye ma tã y, pe sē yee ma naa le pãã yē ya ne ye. Ma'a ma

nampyen yãã fɛn wo, maa waha yia lii na, le pye u kē, u n cã u ntãŋ dye ma tãy cĩnde.

<sup>19</sup> Wo ma nii loo pye, waa cã wo ma Yãhã ne cĩnde. Wo ma nii loo pye, wo laam ga tege nii tee nen wo, wa'a n pãã Yãhã ne. <sup>20</sup> Wo laam ma sya n wlãhã wo kapee- wãpye wĩ na, wo yai wo cã wo yee, Yãhã ter wo laam wãwlãhã wĩ yaha, ma maha kai- byɛ cã wo na. <sup>21</sup> Naambiyãm, loo na, wo laam ma yee pe sē n wlãhã ye, wo laam ga tege nii tee nen wo, wo n waha pãã Yãhã ne.

<sup>22</sup> Wa'a lii nar ke ye, ke ga le kai pye wo kē. Wo ke kãnde katan yãr ma maha n luhu ke ye. Lii le n tãy ke ye, loo ya too n pye; koo kē ke -sē ne le kai pye wo kē. <sup>23</sup> Ke yee ke kãnde lii ta, wo naa le yãr le nde: -Too ke Dya Yesu ta wo Yater, too tyii wo ntãŋ naa n dye wii tãy mii Yesu wo yar le ne mii. <sup>24</sup> Kãnde lii Yãhã le ta, wii ma le katan gbihi yigi klue sĩ ne, ufua ma Yãhã ne, Yãhã bya ma ufua ne, loho saa waha naa n yi pe nsoho wo ye. Wo -sē ga waha pye mii wo cã wo yee, Yãhã ma wo ne? Yãhã Yrã lii le ma wo laam wo, loo le wo ta wo n le cã.

## 4

*Yãhã laam wĩ pyefa tesē ke napĩ laam wĩ pyefa ne*

<sup>1</sup> Naambiyãm, mpãy byɛ pe n yee, a Yãhã Yrã ma poo laam wo, ye ma n cãã le sya pe ye cĩnde ye! -Ye pe naha yãŋ, ke ma pye Yãhã Yrã ma pe laam wo cĩnde. Ya'a yãã tē ye yar le ne, kawarfa mpãy pe pe ya yee Yãhã kaplãŋ tōrfa, pe tee mii pe yi driyẽ nge tebehe byɛ wo, ma sya nihi ter.



<sup>2</sup> Tee ga pye mii ye waha naa n cã Yāhã Yrã ma pe laam wo, le nde: Wii u nawee- yar ma yee, Yāhã Dya Yesu woo kē, u see ba wo ye nawee, ye ga cã Yāhã Yrã ma woofua laam wo. <sup>3</sup> Wii ma -sē loo sye, ye ga cã Yāhã Yrã wee woofua laam wo ye. U kawar Crise laam ter pe ma u ye. Ye u kawar Crise wāpa wĩ luhu driyẽ wo. Tee -sē cã yagaa, u pa wa.

<sup>4</sup> Waa u pii ne, yii mpāy tee ma Yāhã wām, ye yia pe kawarfuafa mpāy na pe pe ya yee Yāhã kaplāŋ tōrfa; pe sē waha ye wlāhã, ma ye le pe kāmpee wo ye. Ya’ a yāã ye waha yia pe na, ye cã Yāhã Yrã ma ye laam wo, koo kē. Loo fānga ter fānga gii yaha ke ma poo laam wo. <sup>5</sup> Poo me mpāy syi ne pe sē Yāhã cã ye, driyẽ nge pii me poo ter mii ne. Koo kē pe n nii driyẽ nge ya yor pāã, driyẽ difa n nii n luhu pe ye. <sup>6</sup> Wii poo na, Yāhã pii me wo ne. Wii ma Yāhã wĩ cã yigi, woosyifua wo kaplāŋ luhu. Wii ma yee u wee Yāhã ne ye, usyifua saa naa n luhu wo kaplāŋ ye ye. Mpāy pe ma cĩnde Yrã ne pe laam wo, tesē mpāy ne pe kawar wĩ yigi yaha pe ya laam wo, waa waha naa pe war koo syi.

### *Wo ntāŋ wādye Yāhã tãy*

<sup>7</sup> -Too tyii wo ntāŋ n naa n dye wii tãy! Ye sē yāã, nawee- ntāŋ wādye wĩ pe ya tãy, Yāhã kē ke n pai loo nde ne. Wii nampyen ntāŋ ma dye u tãy tesē Yāhã ntāŋ ne, Yāhã puee kē ufua ne, Yāhã ma u ne. <sup>8</sup> Wii ma waa ntāŋ wādye wĩ sye u ya tãy, ufua wee Yāhã ne ye; Yāhã koo -sē ma nawee- wāyōŋ wĩ na. <sup>9</sup> Wo ntāŋ dye Yāhã tãy, ke n le yar wo na mii, le nde: Ke ke Dyapuai nen

ya nɔ wāã kãntraha na, ma yee too ba cĩnde yrã yãã u Dya kãmay na, lii wãkuayãã wee le na ye.

<sup>10</sup> Poo ntãŋ wãdye wĩĩ ne nde: Yãhã ntãŋ sã me pe dye wo tãy ye, wo ntãŋ poo me pe dye Yãhã tãy. Loo ne ke n ke Dya nɔ wāã u n ba ku mpar draha wo, ma wo kapee- gbe kãã wo yĩŋ na.

<sup>11</sup> Naambiyãm, le ma pye wo ntãŋ dye Yãhã tãy koo syi, wo bya wo yai wo ntãŋ naa n dye wii tãy.

<sup>12</sup> Waa sã Yãhã yãã yãã yĩnde ne ye. Wo ntãŋ ma -sã dye wii tãy, nawee- bye ga le yãã gbaa na pe yee, Yãhã ke niisaha ta wo laam wo, pe maha ke ntãŋ wãdye ter yãã wo ye.

<sup>13</sup> Yãhã ke Yrã wãã wo kã. Loo ne wo ma Yãhã ne, Yãhã bya ma wo ne, loho sã waha n yi wo nsoho wo ke ne ye. <sup>14</sup> Wo Tuhufua Yãhã ke Dya nɔ wāã, u ba nii driyẽfa Syayahafua. Wii poo na, wo le yãã yĩnde ne, koo kã wo n nii le pãã nawee- bye ye, pe n le cã pe ya ndoŋ. <sup>15</sup> Wii ma yee u sã le wũhũ ye, ma le pãã nawee- ye ma n yee, Yesu ma Yãhã Dya, Yãhã ma woosyifua nwo ne, woosyifua bya ma Yãhã ne, loho sã waha n yi pe nsoho wo ye. <sup>16</sup> Wii poo na, wo le war ma le cã, wo ntãŋ sroŋ dye Yãhã tãy, wo koho taha yaha loo nde na.

Yãhã ma nawee wãyõŋ wĩĩ na. Wii u ntãŋ wãdye wĩĩ ke, ufua ma Yãhã ne, Yãhã bya ma ufua ne, loho sã waha n yi pe nsoho wo ke ne ye.

<sup>17</sup> Wo ntãŋ dye Yãhã tãy. Loo nde ma wo ta Yãhã bye ntãŋ n dye wo tãy, tesã wo nampyeŋ ntãŋ ne, wo ga nii mii Yesu wãŋ ter syi dyaŋ. Yãhã laam wĩĩ ne loo nde ne. Le ma nii ke syi, kasãhã per ma ba nɔ, wo laam ga tege nii tee nen wo.

<sup>18</sup> Wãfya wĩĩ ma suhu ntãŋ wãdye wĩĩ ne, ke sã

wãã le ye. Ma sē yãã, ma'a fya per gii, ma cã ma yee, ma kapee-foho ma ma yĩn na nantãŋ. Ma'a yãã raa fya kuee, ma le cã ma sē le sya cĩnde, ma ntãŋ dye Yãhã tãy ye, Yãhã bya ntãŋ sē maha dye ma tãy ye.

<sup>19</sup> Wo ntãŋ poo me pe cãã dye Yãhã tãy, koo syi kē, Yãhã ntãŋ n dye wo tãy, tesē wo nampyeŋ-ntãŋ ne. <sup>20</sup> Wii ma yee Yãhã ntãŋ dye woo tãy, ma -sē u nampyeŋ laha, ufua ma kawarfuafua. Ye sē yãã, u nampyeŋ wii tuu n yãã yĩnde ne, u ma yee woo ntãŋ sē dye u tãy ye, Yãhã gii tuu sē -sē yãã ye, u ga waha pye mii u yee, ke ntãŋ dye woo tãy? <sup>21</sup> Yãhã ke bii lii yar wo na ke kãnde na, le nde: Yãhã ntãŋ ma dye wii tãy, ufua yai u tyii u nampyeŋ ntãŋ bya n dye u tãy.

## 5

### *Driyẽ wũhũ saa waha yia wo na ye*

<sup>1</sup> Nawee wii woo ma le sya wa cĩnde ma yee, Yãhã Yĩndefua kē Yesu ne, ufua ma Yãhã puee. Wii ma yee Tuhufua Yãhã ntãŋ dye u tãy, ufua yai ke pii bya ntãŋ n dye u tãy. <sup>2</sup> Too ga waha pye mii, wo cã Yãhã pii ntãŋ dye wo tãy, le nde: Ke ma pye Yãhã ntãŋ dye wo tãy, tesē ke kãnde lii ta, wo ma le katan bye yãr, waa cã Yãhã pii ntãŋ dye wo tãy. <sup>3</sup> Ye sē yãã, Yãhã ntãŋ wãdye wo tãy, loo ne, wo naa ke kãnde katan yãr. Ke kãnde katan wãyãr saa kai kua wo ye ye. <sup>4</sup> Ye sē yãã, wii woo tuu ma wa Yãhã puee, driyẽ wũhũ saha yia usyifua na ye. Wa'a Yesu ta wo Yater, loo fãnga ga waha wo ta, wo n yia driyẽ wũhũ na. <sup>5</sup> Nawee wii ter syi ga waha yia driyẽ nge wũhũ

na? Wii tuu le sya cīnde ma yee, Yāhā Dya kē Yesu ne, woosyifua ga waha yia ke na.

*Cīnde lii le yar wo na Yesu Crise wī na*

<sup>6</sup> Yesu Crise kē wii ne tuu pa driyē wo. U pa pe n ba u tãã yi loho wo, u n maha ba u ntãñ woo wo wī na. U sē pa ma ba dye loho ya wo ye; u pa maa dye loho wo, ma maha ba u ntãñ woo taha le na. Wo laam wo, Yāhā Yrã wo yar ma yee, cīnde ne le ne. Yāhā Yrã ne le cīnde ya pãã wo ye. <sup>7</sup> Kate- tãã wo yar Yesu ma Yāhā Dya, cīnde. <sup>8</sup> Koo kate- kē ngī: Yāhā Yrã tesē loho ne tesē ntãñ ne. Ke kate- tãã ngī bye ke yīñ ma neñ. <sup>9</sup> Nawee ma yee woo lii yãã yīnde ne ma ba wo yar, wo sē ne le sya la cīnde? Yāhā ke -sē wo yar lii ne, loo wee la cīnde ma ta ter? Koo sē na, ke ke Dya wī yar wo na? <sup>10</sup> Loo nde na, wii ma Yāhā Dya ta u Yater, ufua le cã laha u laam wo ma yee, Yāhā ke wo yar lii ne ke Dya wī na, cīnde ne le ne. Wii ma -sē yee u sē Yāhā Dya ta u Yater ye, Yāhā ke wo yar lii ne ke Dya wī na, u sē le sya cīnde ye. Ke nii mii ufua Yāhā ta kawarfuafua.

<sup>11</sup> Yāhā ke wo yar lii ne ke Dya wī na, loo ne nde: Yāhā cīnde yrã ta wo myaha na, lii wãkuayãã wee le na ye. Wo -sē ga waha loo cīnde yrã yãã ke Dya kãmay na. <sup>12</sup> Yāhā Dya wī ma pye wii laam wo, ufua ga waha loo cīnde yrã yãã. Wii ma -sē yee, ke Dya wī wee u laam wo ye, ufua saha loo cīnde yrã yãã ye.

*Yāhā pii laam tege nii tee nen wo*

<sup>13</sup> N kaplãñ ngī yrũhũ ye kē, ye n waha cã cīnde yrã ma ye ye, lii wãkuayãã wee le na ye,

yii mpây tee Yâhã Dya ta ye Yater. <sup>14</sup> Wa'a n pãã Yâhã ne, wo laam ne tege nii tee nen wo. Nwa ta? Wo ma lii nar Yâhã ye, le kai ma pye ke laam wĩ, ke ga wo wãnar luhu, koo kē. <sup>15</sup> Wo ma -sē cã, ke ne wo wãnar luhu, wo cã ma yee, wa'a ngii ngii nar, ke ne le kai pye wa wo kē.

<sup>16</sup> Wii ma u Yesu kãndeyãrwε yãã tuu kapee laa pye, kapee lii le sē u cēr cĩnde yrã na u kuãᅇ ne ye, ufua n Yâhã nar u kē, Yâhã n cĩnde yrã wãã u kē, lii wãkuayãã wee le na ye. Mpây kapee- ke sē pe cēr cĩnde yrã na pe kuãᅇ ne ye, poo wĩ ne tē n pãã. Ma -sē yee wii na, u kapee u cēr kãã cĩnde yrã na u kuãᅇ ne, n sē yee ye Yâhã nar u kē ye. Ye yai ye cã kapee laa ma, le nawee cēr n kãã cĩnde yrã na u kuãᅇ ne. <sup>17</sup> Kainkãy byε ke sē sron ye, kapee- kē Yâhã yĩnde na. Kapee- nkãy -sē ma, ke sē nawee cēr n kãã cĩnde yrã na ye, lii wãkuayãã wee le na ye.

<sup>18</sup> Wii ma nii wa Yâhã puee, u saha kuee naa kapee- pye ye. Yâhã Dya n sēᅇ ufua na, koo kē. Ke syi ne, sãndãpee yĩᅇfua Setane saha laa pye u na ye. <sup>19</sup> Driyẽfa byε ma sya yee pe wee Yâhã pii ye, ma nii sãndãpee yĩᅇfua koho wo, wii poo na wo cã ma yee, wo ma Yâhã wãm. <sup>20</sup> Wo cã Yâhã Dya pa, ma ba cãã- le wo laam wo, wo n waha Yâhã cã koo gii ke ma cĩnde. Wo wãã le wo Tuhufua Yâhã ne ke Dya Yesu Crise kãmey na. Ye sē yãã, Yesu woo kē u ma cĩnde Yâhã, ma maha ma cĩnde yrã, lii wãkuayãã wee le na ye.

<sup>21</sup> Waa u pii ne, ye ma syi ye naa mpar wãn yãᅇ Yâhã ye! Te saha nii Yâhã ye.

**YĀHĀ NAAMBIYĀRFĀN SABA**  
**Karaboro, Eastern: YĀHĀ NAAMBIYĀRFĀN SABA**  
**New Testament**

copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

---

PDF generated using Haiola and XeLaTeX on 22 Feb 2024 from source  
files dated 29 Jan 2022

15120496-00e2-503a-8d40-2d7cfdc1ba5b